



## **Preaviso: presupuesto pa inisiativanan Aña pa Konmemorashon di Pasado di Sklabitut**

Durante e Aña pa Konmemorashon di Pasado di Sklabitut di 1 di yüli 2023 te 1 di yüli 2024 lo dediká èkstra atenshon na un parti importante i doloroso di nos historia i na kual te ku resien a duna tiki atenshon: e pasado di sklabitut. Den kuadro di esaki Gobièrnu di Reino ta pone 2 mion euro disponibel pa aktividatnan i inisiativanan ku ta kontribuí na konmemorá i selebrá abolishon di sklabitut den Reino. Mondriaan Fonds i Fonds voor Cultuurparticipatie kada unu ta risibí 1 mion euro pa durante e Aña di Konmemorashon sostené aktividatnan di tantu institushonnan komo individuonan i inisiativanan chikitu lokal ku ta establese den e parti karibense di Reino i na Hulanda.

### ***Aña pa Konmemorashon***

Mas ku 300 aña largu hende grandi i muchanan for di partinan di Afrika, hopi biaha tambe dor di trafikantenan hulandes di katibu, tabata wòrdu sekuestrá i transportá ku barku bou di kondishonnan deshumanisante via laman Atlántiko pa e èks kolonianan hulandes: Sürnam i e islanan karibense Aruba, Boneiru, Kòrsou, Saba, Sint Eustatius i Sint Maarten. E habitantenan original di e diferente kolonianan hulandes tampoko tabata skapa. Na Asia esnan ku a keda hasí katibu tabata wòrdu trafiká pa áreanan ku tabata bou di mando di Vereenigde Oostindische Compagnie (VOC)<sup>1</sup>. Pa generashonnan largu hendenan tabata nase den sklabitut. Nan tabata wòrdu obligá pa henter nan bida hasi trabou di katibu, pa benefisio di e doñonan hulandes di plantashi.

Pa lei a abolí sklabitut riba 1 di yüli 1863 den e kolonianan di Reino hulandes di e tempu ei, Sürnam i e islanan karibense. Tòg mayoria di esnan ku a keda hasí katibu mester a keda traha 10 aña mas riba e plantashinan bou di supervishon di estado pa asina limitá e “daño di e medida akí” pa e doñonan di plantashi (ku otro palabra e daño pa motibu di abolishon di sklabitut). Ta p’esei pa hopi hende den e reino di e tempu ei sklabitut a kaba te den 1873 numa. Dia promé di yüli 2023 esei ta 150 aña pasá.

For di 1858 te basta tempu despues di 1873 hendenan for di Asia te asta ku trabou bou di kontrakt tabata wòrdu someté na trabou pisá na Sürnam bou di e mando hulandes kolonial.

Durante e Aña pa Konmemorashon Hulanda ta para ketu na e historia doloroso akí i e konsekuensianan pa tur e hendenan ku di un òf otro manera tabata enbolbí den esaki, i na e efekto kontinuo di esaki den e sosiedat aktual.

Diferente komunidatnan di desendientenan di esnan ku a keda hasí katibu, e hendenan indígena di e pais i esnan ku a traha bou di kontrakt ta forma parti inseparabel di e historia akí. Esakinan ta entre otro e hendenan indígena di e kolonianan di e tempu ei Sürnam i e seis islanan karibense, chines, havanes i hindustan trahando bou di kontrakt, i tambe por ehèmpel komunidatnan moluko, ganes i surafrikano. P’esei e eksperensia di komunidatnan no oropeo enbolbí den e pasado di sklabitut ta para sentral den e aktividatnan durante e Aña di Konmemorashon.

Mondriaan Fonds i Fonds voor Cultuurparticipatie lo parti e presupuesto pa medio di 2 konvokashon habrí. A hasi e konvokashonnan den kolaborashon ku miembronan di grupo di skuchadó crítico ku ta bini di diferente komunidatnan konserní.

### ***Konvokashon Mondriaan Fonds***

E konvokashon di Mondriaan Fonds ta dirigí su mes riba proyektonan i aktividatnan ku ta sigui engrandesé e konosementu i e konsientisashon di e pasado di sklabitut i e efekto kontinuo di esei te dia djawe.

Un grupo amplio di petishonarionan establese den e parti karibense di Reino i na Hulanda por hasi petishon na Mondriaan Fonds. Ta trata di individuonan ku un profeshon den e disiplinanan di práktika di arte plástiko, patrimonio, industria kreativo, arte teatral, òf krusamentu den e disiplinanan akí. Banda di esaki organisashonnan ku tin komo tarea prinsipal organisamentu di presentashonnan ku ta aksesibel pa públiko, archivonan i bibliotekanan por hasi petishon. Por pidi entre € 5.000 te € 75.000 pa proyektonan.

---

<sup>1</sup> Kompania Uní di India Oriental.



E konvokashon di Mondriaan Fonds lo wòrdu habrí den novèmber. Tin 2 momentu final pa hasi entrega di petishon: e promé ta den yanüari i e di dos ta den april 2023. Bo ke risibí un mensahe via e-mail asina ku e konvokashon habrí wòrdu habrí? [Registrá aki](#). Den novèmber nos ta organisá un enkuentro di informashon tokante e konvokashon Aña di Konmemorashon di Pasado di Sklabitut.

***Konvokashon Fonds voor Cultuurparticipatie***

Na e konvokashon di Fonds voor Cultuurparticipatie e enfoke ta riba aktividatnan kaminda e partisipantenan ta enbolbí aktivamente. E supsidio ta pa inisiativanan den kua partinan nobo di e historia i sklabitut ta bini dilanti, material di edukashon ta wòrdu kreá, prosesonan di sanashon ta wòrdu stimulá, òf kolaborashon (internashonal) entre institushonnan ta wòrdu habrí. Di e manera aki e Fondo ke engrandesé konosementu, konsiensia i visibilidat di e pasado di sklabitut pa siguiente generashonnan tambe. Mas o ménos den mitar di yanüari 2023 e areglo di supsidio ta habri, i pa esaki lo tin 1 mion euro disponibel.

Por haña informashon di e konvokashon aki riba [website](#) di Fonds voor Cultuurparticipatie.

Les e komunikado aki i e Pregunta i Kontesta Gobièrnu di Reino – [Aña pa Konmemorashon di Pasado di Sklabitut](#)

Pa mas informashon por tuma kontakto ku [Lotte Hemelrijk](#), [Lise Hermans](#) i [Talitha van Ooyen](#) òf por yama e number general +31 (0)20-5231523).